

Liengzsim

良知

□ Lingz Siuyangh/凌秀香

Boux sai loh gvaq aen bouq gai manzdouz seiz, nyaenx mbouj ndaej daengx din lo.

Aen bouq neix youq byaihaw, bakdou bouq miz aen congz haemq sang ndeu, gwnz de miz aen habcej he, aen neix dwg habhaiz, seizneix dawz daeuj cang ngaenz. Gwnz congz lij miz haujlai bingz gienghduh dem. Henz congz miz aen lozfeiz ndeu, gwnz loz gangq aen cauq he, ndaw cauq miz seiq aen caengq doxdab, gij fwi daj ndaw caengq biu okdaeuj, geu dem geu hopheux youq gwnz caengq, yaepyet couh siubae lo, heiqhom manzdouz raq dem raq biu coh seiqlengq, hawj vunz myaiz rih.

Boux cawjbouq dwg boux goenglau ndeu.

Boux sai mup daengz heiqhom manzdouz, hozgyaenh nod hwnj nod roengz, daegbied dwg raen gij ngaenz ndaw hab, sim de nodnuem yaek doengh, aifwngz humznyubnyub.

Doeklaeng, de mbouj aeu ngaenz, swnh goenglau mbouj haeujsim, de riengjret caeg aeu bingz gienghduh ndeu couh vaiqvid byaij deuz, ndoj youq giz guggeh gwn.

De gaenq sam ngoenz mbouj miz maz doxgaiq gwn roengz dungx lo, seizneix iek ndaej naengdungx doxnem. Hoeng, gwn donq neix heiq donq laeng, baenzlawz guh? Maeh daengz gij ngaenz ndaw hab, de gag naeuz: Dai dangqveiz! De daj baihlaeng yut fagmid okdaeuj cim yaep he, bakmid lwenqmyabmyab, hawj vunz ndangndum, fagmid neix gaj vunz gvaq.

De dawz mid byaij daengz bakdou bouq gai manzdouz, fagmid yo

youq ndaw genbuh, ngamq yaek roengzfwngz, cix raen goenglau cingq cim swhgeij, de miz di simhaw, itseiz mbouj rox baenzlawz guh. Seizneix de ndaejnyi simdaeuz swhgeij diuqbubu, lumj miz duzdouq manz ndeu youq ndaw dungx luenh bungq nei, de boq song amq heiq raezrangh, sikhaek dawz duz neix ap caem, caemh daengq swhgeij aeu damhdingh, caj seizgei caiq roengzfwngz.

Mwh de yaek baenqndang deuz, cij raen goenglau yienh song aen manzdouz caeuq bingz gienghduh ndeu hawj de. Boux sai nyengh dwk……Najgaej liux, dinghdingh ndwn dwk……

Goenglau raen de mbouj cieq, naeuz: Gwn ba.

Boux sai yaemhywq yaep he, gaenriengz menhmenh iet fwngz cieq aeu lo.

Yawj aennaj unqswnh goenglau, de roxnyinh daengx ndang raejrub, baez daih' it deng vunz gvansim, de gikdoengh raixcaix. Gyangfwngz gaem gaidgwn, lij nyengh youq gizhaenx, siengj naeuz coenz song coenz vah gyo' mbaiq, hoeng, mbouj rox daj gizlawz gangj hwnj. De yiengq goenglau baiq mbat ndeu cix bae lo……

Yawj ngaeuzlaeng boux sai bae haenx, goenglau danqheiq naeuz: Byoem raez mumh co, mbouj rox ok maz saeh, baenzneix baihsaiq.

Boux sai ndoj youq giz mbouj gyae haenx gwngek, doq gwn doq yawj coh aen bouq, yawj goenglau, goenglau byaij daengz gyawz de yawj daengz gyawz, doq gwn raemxda doq rih……

Ngoenz daihngaih banringz, boux sai youh daengz bakdou bouq gai manzdouz.

Goenglau raen le ndawsim gag naeuz: Boux neix youh iek lo. De daj ndaw caengq dawz song aen manzdouz okdaeuj, hoeng, cienq gyaeuj dauq seiz, boux sai haenx mbouj raen lo, yawjyawj seiqlengq, byaihaw

hoengqvangvang.

Miz gingceh hai gvaq, mbouj rox vihmaz, seizneix goenglau roxnyinh dungxmbouq, lumj yaek miz maz saehhung nei.

Goenglau soudan seiz, fatyienh laj habcej miz mbaw bauqcej ndeu, hainduj de mbouj dawzhaeujsim, cij liuq da ndeu. Hoeng, couh dwg baez liuq neix, sawj de doeksaet yat: Gwnz de miz mbawsiengq ndeu ciuyinx de, haeujsim baez cim, naenggyaeuj cumh liux, gwnz bauqcej doenggaeb bouxgajvunz gingqyienz dwg boux sai haenx.

Goenglau simsoh haenx, lawq le yaep dem yaep——Dauqdae bauq mbouj bauqgingi? De dawz mbouj dingh cawjeiq……Doeklaeng de dwk denva hawj 110.

Gijneix cungj deng boux sai haenx yawjraen liux, de ndoj youq giz haemq gyae, yawj gij neix caezcienz.

Mbouj geij nanz, gwnz gai miz lai boux gingcaz cunzloz, daegbied dwg seiqlengq bouq gai manzdouz engq miz lai boux gingcaz cunz.

Raen daengz neix, boux sai mboujdan mbouj buet, cix mbouj gaenj mbouj gip byaij daengz bakdou bouq, cim coh goenglau, naj laep-saengsaeng, lwgda daengx sohswdswd lumj yaek gwn vunz nei.

Goenglau raen yienghneix cix mbouj lau saekdi, lij aeu ronghda naeuz hawj de: Miz gingcaz, vaiq di deuz!

Liuh mbouj daengz, boux sai dawz mid okdaeuj, vix coh goenglau, bakmid lwenqmyabmyab, lumj sikhaek yaek aeu minghvunz nei.

Goenglau mbouj lau, cix damhdingh cim de. Yaepyet, boux sai cuengq fagmid lo, “gvangdang” sing ndeu, fagmid doek gwnz dieg.

Seiqhenz gingcaz cung gvaq-daeuj gaemhdai de youq gwnz dieg, doengh mbouj ndaej saek di.

De daengjhoemj youq gwnz namh, song gen ngaiz gingcaz geuh youq raeblaeng, aen naj ngengq gwnz

namh, cienq coh goenglau.

Yawj aen naj deng gaemh ndaej mbitniuj haenx, goenglau dungxcieg caemh sim'in.

Gingcaz saj aendaepfwngz hawj de le, riuj de hwnqdaeuj. Mwh gingcaz yaek gaemh de bae, de gouz gingcaz hawj de caeuq goenglau gangj song coenz vah.

Goenglau laihnaeuz de yaek ndaq roxnaeuz mieng swhgeij, gaenq guhndei swhsienj cunjbei. Hoeng boux sai daengz dangqnaj de, cix dinghcaem dwk naeuz: Bauqcej dwg gou cuengq youq gizhaenx. Gangj sat yiengq goenglau baiq mbat ndeu cix bae lo.

Byaij ndaej geij yamq, de ngeux gyaeuj dauq, riunyumj coh goenglau. Sairiu de mbaeumbeng, hawj vunz roxnyinh de maz saeh cungj cuengq roengz liux lo, ronghda de naeuz, gou ndang soeng sim sangj……

Goenglau fwt mingzbeq gvaq-daeuj, de caiq dawz bauqcej daeuj yawj, baihlaeng bauqcej raiz miz geij hangz saw:

Gou gaenq mbwq gij saedcej ndoj dieg bae dieg lo, mwh gou cingq vih baenzlawz gatgoenq diuz mingh swhgeij dawz mbouj dingh cawjeiq, dwg gij simndei mwngz daj-doengh gou, hawj gou miz damj mienhdoi yienhsaed, gyo' mbaiq manzdouz mwngz. Sam fanh maenz cienz gawjbauq haenx, dwg gou bauqdap mwngz. Mwngz haengjdingh geizheih, gou vihmaz baenz boux-gajvunz? Lwnh mwngz nyi, ranzvunz gou ciengznienz deng bouxyak hangz, amq heiq neix, gou ndwnj mbouj roengz, cix bae ra boux de “suenqsoq”, doxhoenx seiz, gou loengfwngz dub de dai. Gou gaenq ndoj cib bi lo, cib bi raezrangrang, gij saedcej sim venj ndaw hoz haenx, gou souh gaeuq lo, hix mbwq lo……

Sam fanh maenz cienz gawjbauq, goenglau mbouj aeu, de laeglemx geiq bae lauzlaep(gamlauz) hawj boux sai haenx.

Youq ndaw lauzlaep, boux sai biujyienh ndei, ginggvaq geij bi gajcau, de ndaej daezgonq oklauz.

Baez okdaeuj, de bae yawj goenglau gonq, hoeng, mbouj raen goenglau, baez cam vunz cij rox, goenglau gaenq gvaqseiq. Gaiq ciubaiz gaeuq haenx, lij venj youq gwnz dou. Aen bouq gai manzdouz neix yienznaeuz dwg aen bouq bingzciengz ndeu, hoeng, dwg aen dieggozgut ciuhvunz boux sai.

Boux sai yungh sam fanh maenz haenx, laebdaeb hai aen bouq roengzbae, ciepcienz gij simndei goenglau roengzbae……